

Inzko: Reintegracija i funkcionalnost moraju ponovo biti vodeći principi za Bosnu i Hercegovinu



“Želim naglasiti koliko je suštinski važno da mudro iskoristimo 20. godišnjicu Daytonskog sporazuma, obnovimo našu viziju za Bosnu i Hercegovinu i ponovo otkrijemo našu svrhu”, rekao je visoki predstavnik Valentin Inzko na forumu čiji je domaćin bio grad Dayton, u znak obilježavanja 20. godišnjice Daytonskog mirovnog sporazuma.

“Progresivna vizija, zajednička vizija reintegrirane i funkcionalne Bosne i Hercegovine, koja ima svoje čvrsto mjesto unutar evroatlantske porodice, imala je centralno mjesto u značajnim pomacima koji su ostvareni početkom 2000. godine i u nekoliko narednih godina”, rekao je visoki predstavnik. “Reintegracija i funkcionalnost moraju opet postati vodeći principi Bosne i Hercegovine”.

“Bosna i Hercegovina je postigla najimpresivniji napredak kada je bila najambicioznija i kada je bila fokusirana na ostvarivanje strukturalnih reformi, bilo da je riječ o reformi odbrane, reformi indirektnog oporezivanja ili pak naporima na uspostavi i jačanju slobode kretanja... sve su to pomaci koje danas uzimamo zdravo za gotovo,” rekao je. “Imajući u vidu aktuelni reformski program, i ono što dolazi iza njega, ne dopustimo da nas zastraši ambicija uz koju smo postigli tako puno u prvih deset godina provedbe mira.”